



REGULAMENTO DO COMITÉ GALEGO DE XUÍCES DE ATLETISMO

CAPÍTULO I

CONSTITUCIÓN, OBXECTO E DOMICILIO

Art. 1º. - Con arranxo ó que dispoñen os Estatutos da Federación Galega de Atletismo e o Real Decreto 1835/91 de 20 de decembro, constitúese o Comité Galego de Xuíces como Órgano Técnico da mesma.

Art. 2º. - O Comité Galego de Xuíces ten como obxecto velar pola observancia do Regulamento Internacional de Atletismo, apreciación correcta dos resultados das Competicións Oficiais, interpretación e aplicación uniforme de dito Regulamento e dos particulares das Competicións Oficiais en tódala Comunidade Autónoma e regulación dos dereitos e obrigas dos Xuíces.

Art. 3º.- O domicilio do Comité Galego de Xuíces será o mesmo que o da Federación Galega de Atletismo.

CAPÍTULO II

FUNCIÓNS DO COMITÉ GALEGO DE XUÍCES

Art. 4º.- Son funcións do Comité Galego de Xuíces:

- a. Facer cumprir o Regulamento Internacional e informar a tódolos seus membros, así como ós demais Estamentos da Federación Galega de Atletismo, de cantas modificacións sexan introducidas no mesmo e dos criterios uniformes da súa interpretación.
- b. Promover, dirixir e establecer a formación de Xuíces Territoriais, Xuíces RFEA Nivel 1, Xuíces Nacionais, Xuíces Árbitros, Xuíces Árbitros Nacionais, Xuíces de Marcha, Xuíces Verificadores de Circuitos, Xuíces Verificadores de Instalacións, Xuíces de Dirección Técnica, Xuíces de Saídas, Xuíces de Medios Electrónicos e Foto-Finish e outras Especialidades a nivel autonómico, programando os plans de perfeccionamento dos mesmos, así como coordinar a promoción e niveles de formación dos Xuíces Territoriais, facilitándolles docentes adecuados para a realización dos Cursos cando así o soliciten.
- c. Organizar e dirixir Cursos de actualización, seminarios, coloquios e publicacións didácticas ó obxecto de unificar os criterios de aplicación do Regulamento Internacional.
- d. Levar un rexistro actualizado dos nomeamentos dos Delegados das respectivas Delegacións.
- e. Designar ó Xuíces que actuarán como Director de Reunión, Director Técnico, Xuíces Árbitros, Xuíces Xefes de Marcha, Xuíces de Marcha, Xurado de Apelación y aqueles outros que se consideren necesarios para o bo desenvolvemento das probas en tódalas Competicións Oficiais de ámbito autonómico e nas de ámbito estatal que pola súa categoría lo requiran.

- f. Exercer, a través dos Xuíces, a potestade disciplinaria deportiva no desenvolvemento de cada competición.
- g. Solicitar dos Xuíces os informes que correspondan.
- h. Recopilar tódala documentación necesaria para a homologación das marcas que podan supoñer Récords Autonómicos ou Nacionais.
- i. Recopilar tódala documentación necesaria para a homologación de instalacións atléticas para a práctica do atletismo en tódala comunidade galega, así como a súa remisión á Real Federación Española de Atletismo.
- j. Recopilar a documentación necesaria sobre a verificación dos circuítos de probas en ruta de tódalas Competicións Oficiais, así como a súa remisión á Real Federación Española de Atletismo.
- k. Informar á Xunta Directiva da Federación Galega de Atletismo de tódolos seus acordos.
- l. Propoñer á Xunta Directiva da Federación Galega de Atletismo as Normativas que regularán os dereitos e obrigas dos membros do Estamento de Xuíces.
- m. Revisar e dar o visto bo ós resultados oficiais das competicións, propoñendo a rectificación dos erros que neles se detecten (tanto de mecanografía como de aplicación do regulamento).
- n. Aquelas outras funcións que lles sexan encomendadas.

CAPÍTULO III

COMPOSICIÓN DO COMITÉ GALEGO

Art. 5º.- Compoñerán o Comité Galego tódolos Xuíces Territoriais e de categoría Nacional con licenza tramitada pola Federación Galega de Atletismo.

Para o seu funcionamento, o Comité Galego de Xuíces terá unha Xunta Directiva composta por:

- Un Presidente, que será nomeado polo Presidente da Federación Galega de Atletismo.
- A xuízo do Presidente pode propor un Vicepresidente, designado polo Presidente da Federación Galega de Atletismo.
- Un número de Vocais a determinar, designados polo Presidente da Federación Galega de Atletismo a proposta do Presidente do Comité Galego de Xuíces.

Un Secretario, que será o Secretario Xeral da Federación Galega de Atletismo, con voz e sen voto, quen poderá delegar as súas funcións nun dos membros do Comité.

CAPÍTULO IV

DO PRESIDENTE

Art. 6º.- O **PRESIDENTE** do Comité Galego de Xuíces terá as seguintes funcións e atribucións:

- a. Representar ó Comité.
- b. Convocar e presidir as reunións do Comité.
- c. Exercer o voto de calidade en caso de empate.
- d. Propor o nomeamento e cese dos membros do Comité ó Presidente da FGA
- e. Delegar funcións en outros membros do Comité.
- f. Coordinar e estimular tódala actividade, asinando as propostas, nomeamentos, circulares, escritos e calquera documentación que sexa xerada dentro do funcionamento do Comité.
- g. Convocar ás reunións da Xunta Directiva, con voz pero sen voto, a aqueles Xuíces dos que o seu informe poda ser necesario en relación con temas a tratar na Orde do día.
- h. Aquelas outras atribucións que lle podan corresponder polo seu cargo.

CAPÍTULO V

DO VICEPRESIDENTE, SECRETARIO E VOCAIS

Art. 7º.- Son funcións do **VICEPRESIDENTE** do Comité Galego de Xuíces, si está nomeado:

- a. Representar o Comité Galego de Xuíces naqueles actos nos que o Presidente non poda asistir.
- b. Desenvolver as funcións que o Presidente lle encomende.
- c. Presentar os informes das súas xestións ó Presidente.
- d. Facer propostas para o mellor funcionamento do Comité Galego de Xuíces.

Art. 8º.- Son funcións do **SECRETARIO** do Comité Galego de Xuíces:

- a. Custodiar os Libros e documentos do Comité, así como o despacho, rexistro e arquivo da correspondencia, da que dará conta ó Presidente e Vocais respectivos.
- b. Levar ó día os Rexistros e Ficheiros de Xuíces, as súas actuacións, renovacións e datos complementarios, publicando ó finalizar o prazo de renovacións de Licenzas o Catálogo de Xuíces.
- c. Emitir os informes que lle sexan solicitados.
- d. Redactar a Memoria Anual e remitila ás Delegacións da FGA
- e. Confeccionar e remitir as Circulares xeradas.
- f. Materializar os nomeamentos de Xuíces para as Competicións Oficiais e trasladar os Informes dos mesmos ó Presidente e Vocais respectivos.
- g. Levantar acta das Reunións do Comité e remitir copia ós compoñentes do mesmo e á Xunta Directiva da Federación Galega de Atletismo.
- h. Remitir ós membros do Comité Galego de Xuíces tanta información se reciba para o bo desenvolvemento das súas funcións.
- i. Responsabilizarse da loxística do Comité Galego de Xuíces.
- j. Aquelas outras funcións que lle sexan encomendadas.

Art. 9º.- Son funcións dos **VOCAIS**:

- a. Desenvolver as funcións que o Presidente lles encomende.
- b. Presentar os informes das súas xestións ó Presidente.
- c. Facer propostas para o mellor funcionamento do Comité Galego de Xuíces.

CAPÍTULO VI

DOS XUÍCES E AS SÚAS CATEGORÍAS

Art. 10°.- XUÍCES TERRITORIAIS: Comporán esta categoría os Xuíces maiores de 16 anos que dependan directamente do Comité Galego e que superen os niveis de formación que o Comité Galego de Xuíces estableza. A ficha de cada Xuíz Territorial obrará en poder da Federación Galega e no Comité Nacional de Xuíces da RFEA, onde se rexistrará a súas antigüidade, actividade e renovacións da Licenza.

Tamén formarán parte do Comité Galego os XUÍCES RFEA NIVEL 1, XUÍCES NACIONAIS, XUÍCES ÁRBITROS E XUÍCES ÁRBITROS NACIONAIS que teñan tramitada a súas licenza na Federación Galega.

CAPÍTULO VII

DAS INCOMPATIBILIDADES

Art. 11°.- Os Xuíces que posúan licenza de atleta ou adestrador estarán habilitados para formar parte dos Xurados de control en tódalas competicións autonómicas.

Os Xuíces que sexan directivos de clubs e posúan licenza en vigor como xuíces, non poderán actuar nos Xurados que controlen competicións nas que participen as súas correspondentes entidades atléticas como tales.

CAPÍTULO VIII

DAS LICENZAS DOS XUÍCES

Art. 12°.- Os Xuíces integraranse, a petición propia, na FGA, a través da Delegación que o propio xuíz considere oportuno.

Art. 13°.- El período para a renovación da licenza anual será o que determine o Regulamento de Licenzas da Federación Galega de Atletismo.

Art. 14°.- Os Xuíces Territoriais terán unha Licenza tramitada íntegramente na Federación Galega de Atletismo, a cal enviará á RFEA unha relación de tódalas renovadas.

Art. 15°.- Aqueles Xuíces Territoriais que, tras un período de inactividade de máis dunha tempada por causas imputables a eles mesmos, desexen renovar a Licenza, deberán realizar as probas de reciclaxe que se determinen para acadar a concesión da mesma.

CAPÍTULO IX

UNIFORMIDADE DOS XUÍCES

Art. 16°.- Os Xuíces están obrigados en competicións oficiais, a utilizar o uniforme oficial que no seu momento se estableza. Así mesmo estará prohibido a utilización de dita uniformidade fora das competicións oficiais ou actos públicos onde non se represente ó Comité Galego.

CAPÍTULO X

CUMPRIMENTO DAS NORMAS

Art. 17°.- Os Xuíces do Comité Galego de Xuíces, polo feito de tramitar voluntariamente a licenza, están obrigados a aceptar e facer cumprir as directrices emanadas do Comité Galego de Xuíces e aceptar e facer cumprir os Regulamentos e Normativas da Federación Galega de Atletismo.

DISPOSICIÓN ADICIONAL

O presente Regulamento será desenvolto mediante Normas e Circulares do Comité Galego de Xuíces da FGA.

DISPOSICIÓN FINAL

O presente Regulamento do Comité Galego de Xuíces entrará en vigor trala súa aprobación pola Comisión Delegada da FGA dacordo có Art. 20 a) dos Estatutos desta Federación.